

明、薛希憲撰

清、光緒思賢書局刊本

明大政纂要  
(七)

文海出版社有限公司印行

元明史料叢編 第三輯

明大政纂要 (七)

明·譚希思撰

素十三卷 (清·光緒思賢書局刊本)

文海出版社 有限公司 印行

明大政纂要卷之三十九

明都察院右副都御史四川巡撫茶陵譚希思編輯

宏治十六年癸亥春正月己巳朔

令松潘東南二路參將及四川都行二司俱聽分守節制

陞學士張元禎爲太常卿

巡撫湖廣副都御史韓鎬卒

鎬字民瞻廬氏人有才致其撫義烏之饑民燭海洋之神奸成海塘之工築多爲人所稱云

思陸降

退還所據蠻莫等地十三處掣回象馬夷兵過金沙江而歸  
二月復除病痊編修羅琦原職

戶部侍郎顧佐查處薊州牧馬草場還

清出一項二千六百六十有奇請照十二營分定界限牧馬旌表玉山知縣孫景雲妻鍾氏貞烈之門

雲上虞人爲縣有苦節旣亡鍾哭必血下竟自縊死

大明會典成進劉健少師李東陽謝遷太子太保吳寬禮部尙書各兼官如故

梁儲王華陞少詹事劉璣江瀾陞侍講武衛張芮陞學士楊廷和陞春坊大學士劉春楊時暢白鉞俱侍講靳貴陞左諭德毛澄陞右諭德朱希周毛紀顧清俱侍讀傅珪爲左中允陳瀾爲修撰餘各有差

三月令汀州免屬江西巡撫管轄

致仕南京工部侍郎徐恪卒

恪常熟人嗜學性詳慎凡利於國與民者必行其志利害不

恤故樹立有足稱云

禁王府濫請封

但係娼及不良婦所出俱不得請

令秦府鎮國將軍誠澈以本等官職奉保安王宗祀

澈保安王第五庶子也

陞梁儲爲吏部右侍郎

選陳茂烈試監察御史

夏四月令廬陵縣以鍾同祔祭忠節祠

祠故祀宋臣歐陽修楊邦義胡銓周必大楊萬里文天祥也  
我朝增入李時勉劉球劉子輔

戶部奉旨會文武大臣及科道議上足國裕民之策十二事

一重京儲一慎庫藏一實內帑一省供應一度邊餉一清鹽

法一均禁例一處芻料一節香蠟一戒陪克一處存畱一恤  
災傷

詔修國子監樂器

南京兵部尙書參贊機務王繼卒

繼字述之祥符人性清誠有才識遇事敢爲故歷官咸有聲  
績云

五月諭祭大學士李東陽父母

仍造墳安葬

命孔間韶仍襲封衍聖公

韶宏緒子也宏泰卒法當間韶襲封上賜麒麟白玉帶黃金  
盆正德年上幸太學召入觀禮賜宴冠服鞞帶寶鈔如故事  
嘉靖初上兩幸太學召賜亦如之卒年六十有五賜祭葬如

禮

命陝西巡茶御史暫取回京

命內閣撮取通鑑綱目續編節要進覽

陞韓文爲南京兵部尙書

大理寺副李承芳卒

承芳嘉魚人舉進士授評事以講學明道爲務嘗謂今壞天下者莫如學校科舉儒先註疏可一切廢棄當直探孔孟之奧聞者莫察其意指爲誑惑而承芳自信不疑尋謝病去與其弟舉人承箕講學於黃公山疏食屢空相顧自得箕謝會試遊陳白沙門以理學著

京師諸省大旱

六月減蘇松織造三分之一

明史紀事本末 卷三十九  
令武職願赴邊報效者不得一概濫許

鎮遠侯顧溥卒

以保國公朱暉提督團營

宥黔國公沐崑等罪

時王氏額外加租害遍境內故都御史李士實奏之上特治其黨而宥崑等

秋七月瓊州賊符南蛇等平

是役斬首二千五百六十有奇平賊巢一千二百餘所俘其屬千四百人追回被虜者百十五人獲器械二千六百九十有奇

申明親王之國舊例

用船止五百艘除王府及各官應付車輛人夫其軍校人等

船夫俱自備

致仕太子太傅刑部尙書白昂卒諡康敏

昂字廷儀武進人通敏和厚練達政體有謀能斷因事成功  
所少者特骨鯁之節云

停止太倉州織造洗白苧布

吉府儀賓史策有罪革職閒住

以其父元謀刺內官王勝故也元論斬

八月詔纂修本草

錄用忠愍劉球之曾孫祠爲通政司知事

九月命差官查理內府甲字等庫

冬十月命祀宋臣趙清獻公并於蜀

與秦守李冰漢守文翁宋守張詠爲四公廟從巡撫林元甫

奏也

命建祠祀元儒陳澹於都昌

以嘗纂修禮記集說有功後學從邵寶奏也

大學士劉健等論不當畱意佛老上嘉納之

南京兵部郎中婁性進皇明政要

凡四十篇

十一月申嚴惜薪司等處刁徒攬納柴炭之禁

特予祭酒謝鐸祖母趙氏旌表

十二月誅妖人李道明並治告反不實者罪

道明以白蓮社撰妖詞惑人忻州官發其事都御史劉聰委千戶張瑛捕甚急妄執軍餘樊林副千戶黃珍鞠之珍與劉玉有隙因誘林引玉而自爲林具狀言道明有反相以上於

聰轉相告言逐捕旁午又累及郭氏孟麟等道明家族盡被逮產俱沒官奏上得旨傳道明入京下詔獄始露黃珍構陷狀遂下珍獄尋瘐死奉旨道明處斬張瑛戍邊

宏治十七年甲子春正月癸亥朔

停止福建尋訪鷓鴣竹鷄白畫眉紫山鵲等禽鳥

御史陳茂烈以母老陳情乞終養許之

烈少喪父繼總旗役志邁俗晝入公署夜歸讀書祖母憐其孱弱乃韜燈默誦不少輟年十八慨然有悟於顏曾克己省身之學作省克錄以自考登進士司理吉安明允公恕民孚之考績至淮幾凍死所知覆以敝裘及爲御史袍服樸素而身任風紀彈劾不避權貴乞養一疏詞意迫切迫歸躬治畦妻子粗糲人所不堪而泰然自足日坐斗室究極羣書體驗

身心隨得隨錄嘗曰儒有向上工夫詩文特土苴耳

二月命陝西各監苑增築城堡

從楊一清奏也

旌表定國公徐永寧妾丁氏曰貞節

丁永寧卒後三日自縊死

罷壽塔工及真人杜永禪等封號

先是奉旨建壽塔於朝陽門外及撰永禪等誥命大學士劉健等上言前代信佛莫如梁武帝竟餓死臺城本以求福反以致禍觀諸往事可爲明鑒我祖宗治天下堯舜周孔之道而已浮屠異端蠹財惑眾何關於世欲造佛塔非所以訓天下垂後世也異端不可信誥命不當與誥命朝廷所以獎賢勵能雖卿士大臣必待秩滿考最乃得頒給此輩何賢何能

頒布封號流布朝野傳聞後世皆曰此朝廷所給與儒臣所撰擬也天下後世其謂臣等何疏入俱報罷

三月太皇太后周氏崩上尊諡曰孝肅貞順康懿光烈輔天成聖睿皇后立廟別祭

初成化戊子孝莊錢太后崩大學士彭時等議合葬裕陵時已有周太后他日祔葬祔廟之說至是周太后崩隨上尊諡同孝莊之制矣旣而大學士劉健等乃上疏言成化初事有難處臣子姑爲委曲將順之意今當再議於是詔禮部會多官並議以聞上御便殿召劉健等出示裕陵圖一紙言孝莊太后元堂與英廟皇堂相去數丈間隔不通因曰此非大禮當釐正健等奏曰此事臣初不知今欲釐正仰見皇上聖孝盛德高出前古臣等不勝忻服上曰卿等如何得知此事都

是內臣所爲內臣有幾人識道理者昨見成化間彭時姚夔輩奏章先朝大臣都忠厚爲國因論祔廟之禮健等奏曰先年奏議已定孝莊太后居左今大行太皇太后居右並祔裕陵配享英廟且引唐宋故事爲證臣等以此不敢輕議其實漢以前惟一帝一后唐始二后宋亦有三后並祔者上曰二后已非古三后尤爲非禮謝遷對曰彼三后一乃繼立一則所生母也皇上當以堯舜爲法上曰然宗廟事關繫綱常極重豈可毫髮僭差太皇太后鞠育朕躬恩德深厚朕何敢忘但一人之私情耳錢太后乃皇祖冊立正后祖宗以來惟一帝一后今若並祔乃從朕壞起恐後來雜亂無紀極耳且孝穆太后朕生身母至尊稱爲皇太后別祀以奉慈殿今仁壽宅前殿儘寬意欲奉太皇太后於此他日奉孝穆太后於後

殿歲時祭享一如太廟不敢少缺東陽曰皇上言及孝穆太后尤見大公至正之心可以服天下矣上曰此事卻難處行之則理有未安不行則違先帝意又違羣臣議違議猶可奈先帝何朕嘗思之夜不能寢先帝固重而祖宗之制尤重卿等其詳議之健等奏曰容臣等且出計議奏聞時吳寬以禮部尙書掌詹事府眾推寬言寬對眾議曰魯頌姜嫄闕宮春秋考仲子之宮皆爲別廟自漢唐來亦然至宋始有並祔祭其禮已謬然皆諸帝繼室生前作配非後世子孫嗣位追尊所生之比惟宋李宸妃沒仁宗悲痛乃追尊祔祭雖出至情實爲非禮不足爲法眾皆從之會議疏上上喜曰大義深恩並行不悖改孝肅太皇太后祀之奉慈殿殿在奉先殿西上初建以祀孝穆太后至是令展其制中奉孝肅左奉孝穆於

是中外翕然稱合禮云

南京祭酒章懋上選貢疏

言古者大學所養皆天下之俊秀故人材盛而風俗美國家稽古制治猶重大學洪永間生徒數千類多少俊教育之法至是周詳計日以通經積勞以出仕布列席位得人爲多沿及近年歲貢之入監旣多衰遲而舉人之坐監又每後時故差撥常患於不敷而教養尤難於見效近年有增貢之舉而所拔亦挨次之人資格所限英才多滯乞於常貢外令提學憲臣於人才素多去處不分廩增精加考選務求行著鄉閭學通經術年富力强乃許充貢通計天下之廣約取六七百人照依地方送兩監以後或三年五年量才多少間一行之則在大學者多精銳可進之資不貽因循自誤之悔臣雖

不知所以爲教然嚴督課程用申激勵務令行文兼修政教  
粗舉成材有望附選及時庶國家收養士之效而臣亦追尸  
素之愆也命下其議於所司

以樊瑩爲南京刑部尙書

閏四月定南京遣官祭告禮儀

追論貴州普安州敗軍之罪

初隆暢之死於米魯也其妾適烏數以賄求立並請兵討賊  
巡按張淳實許之及米魯福佑之殺阿紀適烏也亦數以賄  
求聽撫罷兵都御史錢鉞副使周鳳都指揮劉英吳遠及指  
揮任禮張瑛楊芳皆受之少監楊友總兵官焦俊及周鳳至  
移文坐取而所遣人又需索侵牟贓穢狼籍其後輸情貪功  
覆師辱國皆所自取至是巡按戴乾黃珂相繼奏其事得旨